

欽定重修兩浙鹽法志

欽定重修兩浙鹽法志卷十二

奏議三

乾隆十六年十二月戶部會議得署理浙江巡撫
永貴等將浙省武員辦理帑鹽事宜核議八款恭
呈

御覽

一帑鹽宜令地方官監同出納也查浙省原領帑
本銀八萬兩已經照數歸還嗣於流積羨餘銀
內截存銀十二萬兩以作收鹽帑本現在轆轤

轉運每年約可銷鹽數萬餘引除增出課餉正
項之外計歲獲盈餘銀二三萬兩不等均係報
撥充餉所收餘鹽尚有差撥弁兵由海運至乍
浦靖江等處交商酌運立法以來引疏課裕各
處行鹽地方商人不畏棍梟滋生事端實藉武
員之力居多但向來各鎮協營請領帑本俱係
赴道庫支領差弁給竈收鹽文武不相統屬非
如地方官有道府上司可以隨時稽察者比若
不立法變通恐日久弊生以啟侵挪扣剋之事

今除浙江提督委員承辦之岱山地方並無文
職駐劄江南提標中營亦不請領帑本且皆有
提督大員親臨督察均毋庸再行置議惟溫台
二處就近均有文員應請嗣後黃巖鎮樂清協
寧海營均會同黃巖樂清平陽寧海等縣具批
具道詳准給領寄貯縣庫給竈之時聽營員會
同各場大使移縣支領收鹽照例遵用庫戥據
實給發毋許絲毫扣短俾文武互相稽察不能
擅行挪動仍令各縣場將收發銀數隨時具報

鹽政及各道衙門查考倘有通同捏報情弊察出卽行叅賠其帑商課程鹽本外輸等項亦令會同徵收寄貯縣庫分別起解支發毋許挪前掩後如此則帑項出納愈爲慎重等語應如該署撫等所奏辦理

一鹽斤宜令各場員會同收發也查收買餘鹽向歸營員經理秤收發賣俱得自由臣等鹽政衙門無從核其實數致有私運出洋貨賣及重秤浮收等弊應請嗣後溫台二府之各鎮協營赴

竈收鹽均令會同該場大使遵照較准官秤秤收入厥貯厥之後或交商領或運乍浦亦照例會同秤發出厥仍令該大使按旬冊報鹽政及各道衙門查考庶鹽斤收發皆歸實在而私售浮收之弊亦可漸除等語均應如所奏辦理

一承辦之員宜定也查提鎮大員責任綦重本不宜親身會計致有廢弛營伍之事且鹽政爲巡撫衙門專政承辦之員自應聽巡撫節制方得指臂相使今除樂清平陽寧海皆係副叅江南

松江提督及浙江提督亦俱委中軍叅將例聽巡撫節制外惟黃巖原係鎮臣經理應請嗣後黃巖鎮收發銀鹽改委該鎮中軍承辦仍照江浙提督之例責成鎮臣督察其各處司廩巡緝收鹽之弁俱令該副叅等詳明臣衙門給發委牌以專責守則政歸畫一庶該鎮協營俱不致藉名辦鹽有疎操練廢弛營伍等語應如該署撫等所奏辦理

一盤查之例宜嚴也查浙省各處辦帑銀鹽先於

乾隆四年題奉定例歲底文武互盤結報但彼此不相統轄且無虧空著賠之條不免瞻徇情面虛應故事嗣後應將黃巖縣黃巖場協辦之黃巖鎮中營帑鹽寧海縣長亭場協辦之寧海營帑鹽均令台州府會同黃巖鎮歲底盤查結報樂清縣長林場協辦之樂清協帑鹽均令溫州府會同溫州鎮盤查結報其江浙提標中營所辦銀鹽責成兩處提督率同寧波府松江府結報倘有挪移虧空照地丁錢糧之例將會辦

各該文武及盤查之知府分別著賠系處如係
武員將監盤之提鎮一並議賠其台州溫州二
府令溫處道寧紹台道盤查崇明場令太倉州
盤查仁和場令杭州府盤查青村下砂袁浦三
場令松江府盤查倘有虧缺亦照前例辦理如
此則責任既重稽查益密不致有扶同徇隱之
弊等語均應如所奏辦理

一收發商竈鹽價宜徹底清釐也查向來商人領
鹽繳價另有外輸公費銀兩有時銷鹽稍少公

用不敷每令商人虛領廢鹽完納外輸以充公用名爲已領未運鹽斤又因海濱窮竈柴溲無資往往預發帑銀然後收鹽以致銀鹽虛實混淆不清應請嗣後各商務令先納課程方准領鹽運銷毋許預領先繳外輸每商領鹽總以四百引爲率完足前帑再領後鹽其給發竈價非實在無力窮戶不得預行借給乏本之竈亦飭該大使會同按月支發先清前鹽再領後帑倘有借次混淆通同舞弊察出一并嚴叅如此則

商竈之欠項可清等語均應如所奏辦理

一代商收賣餘鹽宜立法稽查也各處辦帑武職
江南浙江提督及黃巖鎮三處均有私梟充斥
素不銷鹽地方代商售賣引鹽非屬附近場竈
卽係濱臨海澨原非武職不能彈壓自前督臣
李衛立法至今歲銷引鹽頗廣但江浙提標所
辦之松城岱山二處尚屬歷久相安而黃巖鎮
不免奉行有弊總緣該處收發鹽斤向無專責
且賣獲餘利每包約計三錢有零均應給商收

領弁目所得飯食每包祇有四分公用不敷是以不肖之員任意侵扣應請照江浙提標之例於大陳石浦石塘等處令該鎮委定弁目專司經理廣爲銷售預行報明立案所賣引鹽餘利酌量增給飯食公費之外盡歸帑鹽盈餘項下報撥充餉毋庸再行給商亦毋許違例多賣倘有欺隱侵蝕者察出卽照侵盜錢糧例治罪如此則辦員責有攸歸而帑羨益不敢有侵扣等語應令該署撫等將黃巖鎮帑鹽令該鎮委定

弁目廣爲銷售預行報明立案所賣引鹽餘利
該撫酌定給與飯食公費外下剩銀兩統歸帑
鹽盈餘項下造報充餉倘有欺隱侵蝕等弊卽
照侵盜錢糧例治罪

一緝私之法宜嚴也查浙省辦帑各屬從前均係
私鹽充斥之所自歸武弁辦帑業已引疏課裕
數年以來未免從事因循漸不若從前奉行之
力若非大加整飭恐致積玩成疲各處地棍梟
徒復萌故智應請嗣後各武職辦鹽地方收鹽

場竈遇有失察大小私鹽之案將副叅等照兼轄官例議處委辦之備弁並照專汛官例議處其本係專管統轄者免其重科倘有實力巡緝拏獲大夥私鹽照例按其所獲起數分別議敘仍俟部議覆准之日飭將各官弁辦鹽地方收鹽場竈逐一查明報部其各該沿海地方務令實力嚴行巡緝如有奸民私煎私販以及越境私賣者槩准查拏稟究如此則定例綦嚴私鹽既靖官鹽益疏等語應如所奏仍令該署撫等

將各官弁辦鹽地方收鹽場竈逐一查明報部
備案其各該沿海地方務令實力嚴行巡緝如
有奸民私煎私販以及越境私賣者一并查拏
究治

一各處經費宜清也查各該文武既經兼理鹽務
則一切文書紙劄弁兵工食緝私賞號等項原
屬必不可少之公用故松江提標每引給與養
廉伙作等銀九錢四分浙江提標每引亦給有
工食水腳等銀六錢四分惟台所每引祇給外

輸銀四錢溫所每引祇給外輸銀二錢爲裝鹽
蒲草水腳建倉巡費等項公用有餘則歸盈餘
造報從前立法之始原屬參差不齊是以溫台
二處復有該商等捐備引費公費等項名色以
供各衙門紙劄飯食賞號之需歷久相沿已非
一日雖前督臣李衛原奏本由各處皆屬積私
廢地欲其實力緝私明使稍獲餘利但臣伏思
鹽斤爲民食攸關價羨卽

國課所繫若仍循陋習不爲明定章程保無再有如

叅故黃巖鎮孟伍進之剋剝商竈暗裏多收者
應請將各府協營現在所收經費令其逐一據
實開報所有現設之巡鹽兵役虛糜廩祿者并
令逐一刪除裁汰容臣另行查明分別應畱應
革奏明定案此外如再有浮收侵剋之弊卽行
嚴叅究處等語查浙省各府協營辦銷帑鹽所
收經費向聽各員自行收支並無報部核銷其
每年所收若干應支若干以及可否刪除裁汰
之處必須該撫等詳細確查據實分別始可酌

定章程今該署撫等既奏稱現在另行查明分別應留應革奏明定案應俟查明具奏到日戶部另行核議奉

旨依議欽此

乾隆二十六年二月戶部爲遵

旨議奏事覆浙江巡撫兼管鹽政莊有恭題稱浙省額引例分冬夏兩掣夏掣定於六月冬掣定於十二月俟掣驗上倉然後陸續完課去奏期不及五月浙商資本微薄轉運不前委難趕副請照粵省歲

底造冊報銷之例辦理將開彙展限舊習永行停止等語查錢糧奏銷原有例限今將奏銷展至歲底蓋緣錢糧不能依期完納之故但歷年既已遞歷自難以驟復定期與其開彙展限以沿虛名莫若酌予定期以歸實在從前粵省鹽課例於六月奏銷因粵商資本微薄不能依限完納先據兩廣總督李侍堯奏請更定例限統歸年底奏銷經臣部覆准在案今兩浙鹽課該撫既稱遞相遲壓期近力微委難趕副臣等查兩浙情形既與粵省相

同應如所請將兩浙鹽課錢糧奏銷統展至次年
歲底造冊報銷其開叅州縣之積習永行停止仍
令該撫嚴飭各商將每年應完引課務於奏銷前
一月輸納全完造冊奏報如再遲延卽行指名題
叅可也奉

旨依議欽此

乾隆二十六年二月吏部爲人員補用無期恭請
特恩准予酌立年限分別借補以疏積滯事議覆浙江
巡撫兼管鹽政莊有恭奏稱運副降補通判旣准

部臣議覆例得告降今該員等在浙年久歷經差
委於浙省風土事宜尤所熟悉請卽畱浙以應降
之缺酌量補用似於銓政尚無妨礙至以指捐運
判人員逕請借補在外揀調知縣員缺誠與定例
未符但查候補運判中實有效用年久才具可用
之員若令廢棄終身誠屬可惜合無仰懇

皇上天恩於此等人員擇其到浙在五年以上者度其
才力尚堪驅策遇有中簡知縣調補所遺員缺准
其與試用人員一體酌量試署如才堪勝任並無

貽誤試署期滿出具確考送部引

見可否准其補授之處恭候

欽定其運副中有自願告降人員並懇

聖恩准其就近呈明咨部畱浙候補至兩項人員一經
補實卽應照現缺計俸陞轉不得仍照原銜如有
運副運判缺出並不得再議該員請補致令候補
人員仍多壅滯等語臣部查運副一項告降通判
例應赴部具呈歸部按班輪選方爲平允如告降
人員卽畱於該省補用未免過優且於選法亦有

未協至奏稱近年以來如直隸候補運判陳宏模
吳元楷山東候補運判張德履浙江候補運判施
繩武借補知縣卽蒙覆准等語查運判陳宏模等
借用知縣俱係欽奉

特旨准行並無著爲成例不得援引比照今請將運判
度其才力尚堪驅策遇有中簡知縣調補所遺員
缺准與試用人員一體酌量試署之處與陞任浙
江巡撫楊廷璋條奏運判借補知縣事同一例且
知縣爲地方正印官急公人員報捐時定例卽有

差別若違令運判借補恐轉開巧取之漸應將該撫所請運副告降通判畱浙補用運判借補知縣之處均毋庸議奉

旨著照該撫所請行欽此

乾隆二十九年七月戶部爲遵

旨議奏事題覆前任浙閩總督楊廷璋浙江巡撫兼管鹽政熊學鵬會奏玉環之塘洋等處產鹽甚多請動帑辦理事應如所奏將塘洋後垵鹽盤三處准其增給帑本五百兩令竈戶常川煎辦仍令玉環

同知官收官賣南監一場卽於溫州府庫內酌給數千兩設竈煎鹽歸官收買仍令該督等將酌給若干銀兩之處報部查核至該處鹽斤甚廣溫郡民人不能盡數銷售旣據該督等以嘉松二所商人樂於赴溫領運自可通融辦理但亦應聽從商便不得抑勒配運致滋苦累其玉環南監二處每年增出鹽斤暨庫額盈餘各若干應令該撫熊學鵬確查造冊送部核議至一切收管銀鹽稽比巡緝事務應照該督等所議委令就近之蒲門巡檢

照永嘉成例實力承辦仍歸溫州府知府督理溫處道盤查結報并令該地方文武員弁兵役協辦巡查以杜漏私再查南監一場荒廢已久此次設竈煎鹽事屬剗始應令該督撫等畱心察勘俟果有成效再行酌定章程定額徵收其玉環所屬塘洋等三處增出鹽斤將來如何增引行銷之處一并酌議具奏奉

旨依議欽此

乾隆三十年十月戶部爲遵

旨議覆事題覆浙江巡撫熊學鵬奏浙省現在產鹽旺
盛原存帑本不敷酌請增添帑銀收買鹽斤事應
如所奏將兩浙收鹽帑本准其酌增銀八萬一千
五百五十兩零并原存帑本十一萬八千四百四
十九兩零共成二十萬兩之數存畱轆轤轉運所
增銀兩應照例在於公費分規銀內動支給發其
每年所得盈餘并存給帑本各數按年造入帑鹽
盈餘奏銷案內報部查核仍令該撫每年收獲盈
餘銀兩務令年清年款報部撥解倘有侵挪情弊

卽行查明叅奏奉

旨依議欽此

乾隆三十三年正月浙江巡撫兼管鹽政熊學鵬
爲奏

聞事據布政使承德鹽驛道徐綿溫處道蘇凌阿會詳
據溫州府知府李琬稟稱溫州府所轄永嘉長林
雙穗三場分隸永嘉樂清瑞安平陽四縣丁竈三
千餘戶男婦戶口二萬數千餘人向遇市米昂貴
赴該四縣糴借如或縣倉貯穀僅敷縣屬民食不

能接濟竈丁卽赴省城鹽義倉請借銀兩買穀運往按自省至溫州道途遙遠每每緩不及事請趁此本年豐收將省城鹽義倉項下撥銀二萬兩就近買穀存貯溫州府城倉內以資儲備等因具詳到臣臣查倉儲預備民食最關緊要浙江省城鹽義倉項下現存有商捐銀六萬餘兩在鹽道庫內係專爲預備各場竈歉收接濟之需但必俟歉收年分始行領銀買穀運往實屬緩不濟事溫州濱臨大海距省千有餘里道途遙遠與其俟至歉收

之年由省領銀買穀撥運海洋風信靡常難以剋期不若卽於該處預爲貯穀存倉更屬有備臣細加確核本年溫屬豐收溫州所屬永嘉縣乃係首邑樂清瑞安平陽三縣俱附近府城買穀甚易查溫州城內原建府縣倉廩儘有多餘空閒廩間足資貯穀現係永嘉縣經管應如該司道等所請卽於省城鹽義倉項下劃出銀二萬兩交與溫州府飭令永嘉樂清瑞安平陽四縣買穀存貯溫州城倉內仍交永嘉縣經管毋庸另議建倉其每年存

七糴三及還補各數悉照省城鹽義倉例彙冊報
部仍責成溫處道溫州府不時稽查督辦倘有侵
蝕扣剋等弊嚴察詳叅緣關倉儲預備民食事宜
理合恭摺奏

聞奉

旨好知道了欽此

乾隆三十五年十二月戶部爲遵

旨議奏事據調任浙閩總督崔應階前署浙江巡撫熊
學鵬會奏收買定海餘鹽議列六款繪圖具奏一

摺臣等伏查浙江定海縣舟山地方孤懸海外曠
衍五百餘里統計三十七澳居民數千戶素以前
鹽爲業歲納正課銀四十餘兩除自食外所有餘
鹽向係本地自行售賣乾隆二十八年撫臣熊學
鵬奏請發價收買經臣部以海外情形與各省竈
地迥別請交督臣楊廷璋會同該撫通盤籌畫嗣
據接任督臣蘇昌等奏請於十四處大澳設廠收
買復據楊廷璋以該處懸山濱海若處處設立兵
役所費不貲得不償失稽察稍疎易致聚匪滋事

莫若俯順輿情仍令按例輸課經臣部據楊廷璋之言議令照舊輸課在案今據前署浙江巡撫熊學鵬會同調任總督崔應階據陞任布政司富勒渾親詣定海舟山一帶逐加覆勘詳報緣由請將該處三十七澳餘鹽通行收買議列六款繪圖具奏自屬該處實在情形應如所奏辦理臣等謹按款核議恭呈

御覽

一奏稱收買餘鹽宜文武和衷分辦各專責成也

查定海孤懸海外米薪少產增添員役於民食
亦有妨礙應請卽令定海縣知縣鎮標中軍游
擊文武均勻分管則以原有之官弁兵役就近
辦理經費可省食指無增至通計三十七澳應
行酌設入厰所需鹽本並宜充裕民食餘鹽方
得儘數入官應請於鹽道庫收存公費銀內動
撥銀四萬兩以爲收鹽帑本文武各自承領所
需建厰工價亦卽於此內墊發俟收鹽餘息充
裕按數歸還按年將文武領帑收鹽配引輸課

支存餘息各數一并造入帑鹽盈餘冊內題銷
其定海縣營會同分廠收買餘鹽歲底盤查奏
銷事務如係營員所辦帑鹽責成定海鎮總兵
不時稽察於歲底會同寧波府知府盤查結報
如係知縣所辦帑鹽責成寧波府知府不時稽
察於歲底會同定海鎮總兵盤查結報如有虧
挪照例參處等語應如所奏辦理

一奏稱收鹽各澳應因地分任以便查辦也查定
海各山澳除岱山秀山長塗山澳係提標收買

餘鹽應照舊辦理外其餘尚有內港十五澳內
洋二十二澳計共三十七澳今若只收內港而
不兼收內洋則仍畱售私之地且同一餘鹽辦
理亦不畫一若厥過少則交鹽有遠涉之勞又
覺於民未便臣等酌議請將此三十七澳槩行
收辦查內港十五澳附近城邑該縣耳目易周
應歸定海縣於適中之地酌設四厥就近收辦
其內洋之二十二澳離城較遠原非縣役所常
到之地而武職弁兵巡洋緝匪則所常到乃係

武職責成請歸定海鎮標中軍收辦亦於適中之地酌設四厥俾民易於交納其各澳煎戶之多寡仍應聽民自便有餘交官卽給現價不得限數追取等語應如該督等所奏槩行收辦以昭畫一仍令該撫飭屬妥協經理無任玩忽

一奏稱收鹽價值宜酌中定數以免偏枯也查收買餘鹽價值過多則商運不前過少則煎戶又恐虧本必使商運及煎戶兩有裨益方可永遠遵行查定海現在民食鹽價每百斤值錢二百

四五十文今收鹽存厰交商配運應需耗鹽每
百斤請酌加二十斤以抵存厰流滷及捆配狼
藉之數定價三百文收買俾與現在民食鹽價
相等商竈兩無偏枯再查定邑海外鄉愚不識
銀戔通用錢文而商人則例係以銀繳庫自應
仍聽商人按錢文時價折銀完帑營縣照時價
易錢散給煎戶庶覺於民稱便至收發鹽秤應
由鹽道照依部摺較釘平準呈送臣鹽政衙門
烙發應用其引秤之外另釘自十斤起至百斤

官秤亦同部挈較準烙發以便零星收買如各煎戶內有願釘官秤者亦許自釘呈送烙發給用以免爭執倘在厥丁役有輕出重入等弊卽行查拏治罪等語亦應如該督等所奏辦理

一奏稱商人買配宜酌輸餘息以資辦公經費也查浙省辦理帑鹽一切文書紙劄弁兵工食緝私賞號等項原屬必不可少之經費如杭嘉紹松四所商配引鹽於正課公費之外每引另輸引費雜費三錢有零至如浙江提標中營在於

岱山地方配銷餘鹽每百斤於正課之外收餘
息銀八分並無另有引費雜費等項今定海收
鹽其配銷餘鹽請亦照岱山之例免輸引費雜
費每百斤於正課科則外收納餘息銀八分其
商配引鹽除正課公費之外每百斤令輸經費
銀八分一切引雜各費槩行免繳再查江南松
江城內係食浙省之鹽由松江提標中營於府
城設店銷賣其松江所屬之袁浦青村下砂三
場所產鹽斤止供松江郡城以外并奉賢金山

上海南匯青浦等縣民食而松江城內民食鹽斤每致不敷接濟查定海至松江海運甚便請將定海所有收買餘鹽先儘撥運松江提標銷售每年定以四千三百引爲額其餘再聽浙省各所之鹽商領運以裕掣額等語應如所奏辦理至收買鹽斤撥運松江郡城銷賣歲以四千三百引爲額係該督等就該處情形酌量定議亦應如所奏辦理岱山收買鹽斤所收餘息經費銀八分從前如何核定銀數及有無報部之

處未據聲明應令該督等確核報部以憑查核
一奏稱各澳居民自食鹽斤應悉循其舊毋庸更
張也查得定邑係產鹽之區民食之外其餘鹽
不售於官必售於私是以發帑官收俾賣私之
奸民盡爲供煎之良戶並非勒令民間食鹽槩
由官賣其該處民間自食之鹽應悉仍舊包完
鹽課煎戶聽其零賣以便民食如煎鹽各戶或
因本貴停煎或因涵廣多煎均聽其便倘有外
來游匪聞風會聚在彼搭寮起竈擅行私煎興

販侵害引地卽行拏究治罪以靖海疆等語查定海居民自食鹽斤向係納包課銀四十餘兩該督等旣稱仍循其舊聽民自行賣買自屬便民之道應如該督等所奏辦理

一奏稱收鹽應設立書吏秤手巡丁也查設廠收鹽廠書秤手巡鹽兵役均屬必不可少之人請每廠酌定兵役四名派委官弁一員專責經理其文職於寧波府屬下派撥武弁於定海鎮所屬派撥不必另有添設照例按年更換再查岱

山向例每員每月各給薪水銀四兩書役每名
每日給飯食銀二分三釐俱於餘息項下支銷
今定海與岱山均屬一體所有一應支銷薪水
飯食等項均應悉循岱山之例辦理在於餘息
項下支銷至巡查兵役拏獲奸匪向有賞賚之
例應請照例亦於餘息內支銷仍分晰造冊報
部查核等語應如所奏辦理仍令該督等將岱
山支給官役薪食各項銀兩從前如何核定銀
數及有無報部之處查明報部以憑核査以上

各款臣等統按該督等所奏情節悉心酌議請
旨遵行再查該省巡撫卽兼管鹽政地方鹽務均其專
責且近在浙省較之總督稽察易周此案舟山
沿海各澳動帑收鹽事屬剗始責成巡撫畱心
妥辦應令該撫嚴飭派委員弁秉公實力辦理
并令將該處情形悉心體察隨時經理務使商
民均無擾累以靖海疆俟

命下之日行令該督撫等遵照辦理可也奉

旨依議欽此

乾隆三十七年二月戶部爲遵

旨議奏事據浙江巡撫兼管鹽政富勒渾奏稱各商每至掣期往往正引與印照一并請掣正引未竣卽將印照過掣自此正引轉至遲壓又給照行銷之後至奏銷截數時始行請領餘引抵照維時商鹽久已配運請到之引卽應繳銷一領一銷徒屬具文請嗣後請領正引時卽酌定餘引十五萬道隨同給領行銷如正引未完槩不得先掣餘引等語臣等伏查官鹽私鹽之別全以部引爲憑定例鹽

引相隨所關綦重從前兩浙奏明於餘引未到之前暫借印照交商配掣原屬一時權宜之計未可沿以爲例至鹽斤引目既有正餘之分其行銷次序自宜有先後之別該省從前以額引暢銷不敷配運始請頒發餘引自應於正引銷竣之後再銷餘引乃行之既久竟致正引與印照同時並掣不免有遲壓正引之弊而且餘引領到之時已屬應行繳銷之候一領一繳全屬具文尤非核實辦公之道應如該撫所奏嗣後兩浙行銷引目除額引

外每年酌定餘引十五萬道隨同正引檢發賣成
鹽道監掣等官飭令各商儘銷正引如正引未經
掣竣槩不得先掣餘引致滋遲壓其所領餘引或
不敷配用准其暫借下年領到餘引先行配銷俟
奏銷截數之後赴部補領下年缺數引張倘年額
掣不足數所剩餘引隨同奏銷繳部銷燬所有從
前暫給印照之例永行停止俟

命下之日臣部行令該撫遵照辦理奉

旨依議欽此

乾隆三十七年十月戶部爲遵

旨議奏事據署理浙江巡撫兼管鹽政熊學鵬奏前事
等因臣等伏查兩浙鹽引原係分所行銷而各所
情形不同其有此盈彼絀經該督撫據實陳奏亦
准通融改撥今松所地方年銷引額既據該署撫
查明該所附近鹽場商力微薄轉運不前紹所商
力充裕銷鹽亦廣請將松所難銷引目分出二萬
引改撥紹所行銷自屬調濟鹽法之意應如所奏
將松所額引七萬九千六百三十三引內准其分

出二萬引自乾隆三十七年爲始歸於紹所入額
行銷卽照紹所科則按引完納查紹所均課則例
每引三錢九分七釐零松所引課向分三則中則
每引四錢二釐零下則每引二錢八分六釐零下
下則每引二錢五分一釐零應令該署撫將前項
松所分出二萬引按照該所三則課數通盤核算
務使分出引目照依紹所均課則例完納核與松
所原額無虧以裕課款仍造具兩所商人分出添
辦商名引地課項各數清冊送部查核至松所應

銷額引既經撥出二萬引所有現存額引五萬九千六百三十三引爲數較少行銷自易應令該署撫嚴飭該地方官飭令松所商人各按引地照數行銷年清年款如有墮誤立即嚴叅究處又據該署撫稱該所近場之區私鹽充斥等語查緝私乃地方官專責如果畱心緝查何至私鹽肆行無忌致令官引難銷此自係松江所屬文武員弁以鄰省行鹽視同隔膜雖有緝私之名仍以具文了事遂致私販奸徒毫無顧畏應請

旨勅下江南督撫嚴飭松所地方各官遇有私鹽興販立即嚴拏究治不得以鄰省鹽務稍分畛域且不得恃有撥引一法愈置緝私於不問該督撫仍不時稽查如地方官不實力奉行卽行嚴叅究治恭候

命下臣部行令該署撫等遵照辦理并纂入則例遵行奉

旨地方私鹽承緝不嚴官引必致壅滯在江省各屬文武員弁以所行乃浙省鹽斤未免意存歧視雖有緝

私之名不肯實力從事而浙江鹽政又以緝私官弁
兵役皆隔省所轄呼應不靈松所鹽務之疲率由於
此從前李衛以浙江總督兼令節制江南捕盜諸事
是以緝私盡力鹽法暢銷然亦間有過當之處其後
歷任巡撫兼管鹽政未嘗無考核緝私之責而令不
能行之江省地方官往往陽奉陰違因循已非一日
不知行鹽雖在隔境而銷引同屬辦公司蹉者固不
便因鹽務所在之區越俎干預他事其有關鹽政者
原可隨時核計如果江省地方官視緝私爲具文不

肯畱心整頓以致梟徒充斥膜視誤公卽當指叅一二予以應得處分各員弁等自不敢仍前玩忽干咎若僅如戶部所議專責江省大吏督查恐日久尙成故套於浙鹽仍無裨益嗣後松所緝私之事除交江省督撫董飭各該地方文武盡力嚴拏外倘有稍分畛域不肯實心緝私者並准浙江巡撫核實叅奏照例議處該上司等亦難辭督率不嚴之咎如此則江省有司旣無敢膜視卸肩而松所商人亦無由推託藉口方爲兩得餘依議欽此

乾隆三十八年十月戶部爲遵

旨議覆事據浙江巡撫兼管鹽政三寶奏前事等因臣
等查諸暨義烏浦江三縣引地前因行銷壅滯致
將該三縣應銷額引均入別縣行銷今自整頓以
來每年除代銷台引三千三百八道外尚溢銷餘
引二萬餘道是該三縣引目暢銷業經著有成效
所有代銷引目卽與該三縣額引無異自應如該
撫所奏將紹所之諸暨義烏浦江三縣每年代銷
台引三千三百八道卽作爲該三縣額引照均課

則例按引增課其應銷餘引亦卽照均課完納統
自乾隆三十八年爲始按年造入奏銷冊內具題
查核再查紹所行銷引目每引於正課之外例徵
公費等銀二錢五分前因諸義浦三縣引地廢弛
是以奏明免徵今旣引目暢銷將代銷台引入額
行銷所有從前奏免公費等銀是否仍應照舊徵
納之處應并令該撫查明實在情形報部查核可
也奉

旨依議欽此

乾隆三十九年三月吏部爲遵

旨議奏事議得浙江巡撫兼管鹽政三寶奏稱鹽場大使與批驗所大使因其經營無地方民事之責是以例不迴避本省卽有由本處商籍中式及以貢監報捐例得以大使用者內而在部揀選外而督撫鹽政題調均不以其本處商籍另行迴避竊思大使一官品秩雖卑督煎稽私掣驗引目乃其專責若本係該處商籍其父兄叔姪外姻親交卽在其地行鹽雖不必現屬所管而官與商同在一處

分密情親則攀援瞻顧亦難保其必無倘上司查
察稍疎更易從中滋弊與其懲治事後不若預定
防閑臣請嗣後如止係籍隸本省並無商籍行鹽
者仍照舊例毋庸迴避外若係商籍之員應令迴
避本省卽於起文時在文結內聲明某省商籍字
樣咨送吏部註冊俾揀選分發以憑查核迴避倘
敢捏飾隱諱別經發覺卽以規避論所有現在各
省場所大使內如有係隸本處商籍者應請一體
查明迴避與鄰省場所大使對調似於鹽政既覺

整肅而防杜尤爲周密等語應如該撫所奏嗣後
鹽場大使批驗所大使如止籍隸本省並非商籍
者仍照舊例毋庸迴避外若係商籍之員於起文
赴選時在文結內聲明某省商籍字樣咨送吏部
註冊銓選時照例呈明以憑查核迴避倘敢捏飾
隱諱別經發覺照規避例革職所有見在各省場
所大使內如有籍隸本處商籍者均令該督撫鹽
政等查明分別題咨到日另行辦理恭候

命下臣部載入例冊並通行各省一體遵奉施行奉

旨依議欽此

乾隆三十九年七月戶部爲遵

旨議奏事據浙江巡撫三寶奏稱兩浙商人行銷各地引鹽正引掣足之外例請餘引配掣乾隆三十七年間經前撫臣富勒渾於停照用引案內奏准每年酌定餘引十五萬道隨同正引給發飭令各商先銷正引後銷餘引如所領餘引或不敷配用准其借動下年餘引先行配銷俟奏銷時分別缺則補領餘則繳銷按年遵照辦理在案臣查自定例

以來乾隆三十七八九年請領餘引四十五萬道已於三十七年分奏銷案內銷過餘引二十八萬二千五百餘道三十八年分掣過餘引十四萬餘道尚存餘引二萬餘道現在接掣三十八年秋冬並三十九年春夏各引鹽所存餘引不敷配掣雖本年已赴部請領三十四一兩年餘引三十萬道尚未接到算來亦只足敷三十八九兩年之用近來引地暢銷所有每年請領餘引十五萬道約計現在情形不敷掣配與其逐年借用致紊年

例不若量爲加增俾得從容配運應請每年增給
餘引五萬道連前共計二十萬道如蒙

俞允請以乾隆四十年爲始按年預期請領給發該商
等配掣以裕課餉仍俟奏銷時照例查明銷數盈
絀分別補領繳銷再查嘉興紹興二所現在開掣
所存餘引無幾雖新引將次可到而各商收買餘
鹽急需引目捆配請暫用印照飭令過掣以免遲
誤一俟領到新引仍卽按數換給以便行銷等語
臣等伏查該省額領餘引如本年不敷配運原有

借動下年餘引行銷之例今各所行鹽引地既據該撫查明日漸暢銷每年餘引均屬不敷并聲明預領下二年餘引三十萬道只敷三十八九兩年之用與其逐年借用致滋混淆自不若酌增年額以敷配掣應如所奏准其於定例十五萬道之外每年增給餘引五萬道共二十萬道自乾隆四十年爲始臣部按年照數刷印行令該撫隨同正引領回備掣仍照例餘則繳銷倘尚不敷配運卽行先期酌數咨部補領按年造入奏銷以清年款至

該省向例餘引未到之先暫給印照行銷誠恐行之日久未免有遲壓正引之弊已據前撫臣富勒渾奏明將印照永行停止且查本年預領餘引三十萬道前經該撫咨部請領臣部已於五月內照數刷印給發委員齎回備掣按程約計已應到浙足敷配運之用應令該撫仍照舊例辦理毋庸輕議更張致滋弊混奉

旨依議欽此

乾隆四十二年九月戶部爲遵

旨議奏事會議得准兵部咨稱浙江陞任巡撫三寶咨稱乾隆三十五年奏條款內開定海各山澳除岱山秀山澳係提標收買餘鹽應照舊辦理外其內港十五澳附近城邑該縣耳目易周應歸定海縣於適中之地酌設四厰就近收辦內洋之二十二澳離城較遠原非縣役常到之地而巡洋緝匪乃係武職責成請歸定海鎮標中軍收辦亦於適中之地酌設四厰俾民易於交納又每厰酌定兵役四名派委官弁一員專責經理其文職於寧波府

屬下派撥武職於定海鎮所屬派撥兵役均於本地營縣內派撥所需薪水飯食及掣獲奸匪賞資於餘息項下支銷等因細繹原奏各澳地界之遠近巡查之難易以及查緝之飯食賞資均經明晰指陳不惟照此界限分營縣之辦鹽卽以此分兵役緝私之責成也今請酌定處分以專責守嗣後如定邑有售私案件應先查明何澳售販何汛出口如售私在內港十五澳卽將知縣巡檢及管廠之文員均照專管官開叅或售私在岱山內洋各

澳卽將營員廨弁照專管官開叅其守口汎弁悉
照派辦之員一體議處至汎廨捕巡各兵役分別
責革知情故縱者照例治罪等因查地方巡緝私
鹽自應將文武員弁所管地界分晰核定俾營縣
各有考成以專責守今據該撫所咨自係就地方
情形分別定議應請嗣後定海縣如有失察私鹽
之案查係內港十五澳將知縣巡檢及管廨之文
員查叅吏部照例議處如在岱山內洋各澳卽將
營員廨弁及守口之武職查叅兵部照例議處奉

旨依議欽此

乾隆四十三年閏六月戶部爲遵

旨議奏事臣等查得大學士仍管兩江總督高晉等奏
稱浙鹽引地共計十七府二州如浙江之湖州金
華衢州嚴州處州江南之蘇州常州鎮江徽州廣
德江西之廣信十一府州俱係腹裏內地不近場
竈民戶食鹽皆係商人配掣運銷台溫二府所產
之鹽奏明發帑官收儘數招商領運向例雖有額
設老少但令向公店挑賣貧民沾潤無幾又復憚

於遠涉是以數十年並無頂替認充現在亦無老
少挑賣鹽斤之事太倉州之崇明縣孤懸海中向
不設商行引例准包課聽竈煎鹽設有肩販挑賣
以資民食所有餘鹽專責崇明巡鹽大使領帑儘
收運交靖江縣行銷無從越界私販松江府屬場
竈歲產鹽斤松所商人儘收儘配尚不足數設遇
乏產每向別所通融借撥實無餘鹽可供老少挑
賣以上各府均無老少鹽斤惟杭州嘉興寧波紹
興四府屬凡有逼近場竈地方給販挑銷設立肩

引計行銷肩引者則有仁和錢塘海寧餘杭海鹽
石門平湖慈谿鄞縣象山鎮海山陰會稽餘姚上
虞蕭山等十六州縣每縣額設肩販自五六十名
至二百二三十名不等由商保結給與引目每引
一道許其赴場挑鹽八百斤每日賣鹽百斤按照
定界銷賣期滿另給既經納課銷引卽與商鹽無
異歷年久遠從不聞侵害引地接濟私梟自可仍
循其舊至於近場附竈窮黎年在六十以上十五
歲以下及少壯之有殘疾者婦女之年老而孤獨

無依者在於本州縣報明驗實註冊設立腰牌木
籌印烙給發每日卯辰二刻赴場支鹽數不得過
四十斤地不得過十里如有事故開除頂補計額
設老少鹽者則有仁和錢塘海寧海鹽鄞縣慈谿
鎮海象山山陰蕭山餘姚上虞等十二州縣每縣
自二十名至一百五十名不等其多有缺額之處
實止不過六百餘名此等貧難小民生長濱海素
無恆業藉此零鹽提攜售賣以資餬口積久相安
從無違犯而濱海竈地向無官店村落民居就近

買食亦頗稱便若一經停止另籌贍養不無失所
且去其肩負之力使之安坐而食轉恐流爲遊惰
滋生事端卽近場居民旣無老少鹽可買勢必遠
赴城市買食往來跋涉亦多未便第念窮黎固當
矜恤而私鹽之流弊斷不可不除欲杜私鹽惟有
嚴查場竈蓋竈戶煎鹽有餘不售於官卽售於私
若早官爲收買在窮竈同一得價原不必賣與私
販而梟徒無鹽可買亦當改業營生浙江地方各
場竈原有發帑收鹽之舊例自當隨時體察如果

土鹵旺盛商力不繼酌借帑銀儘數收買務使竈戶之鹽除商買外悉歸於官則梟販囤積之弊可以杜絕而貧難老少均沾浩蕩

皇仁於靖地安良之道自有裨益等語臣等伏查兩浙近場之溫台等處前於雍正六年經原任總督李衛以各該處私鹽充斥官引不銷奏請發帑官收杜絕私梟嗣後據歷任巡撫常安等陸續增加帑本共有二十四萬兩每年收買餘鹽除足商人應配引鹽外餘剩鹽斤就近官爲銷賣每年約有盈

餘銀二三萬兩不等計收餘鹽各處並無老少鹽
斤及設立肩引納課銷鹽既據該督等查明歷年
久遠從不聞有越界私販侵害引地情事應毋庸
置議外至設立老少籌鹽之仁和等十二州縣據
該督等聲稱原額自二十名至一百五十名不等
現在多有缺額實止不過六百餘名爲數無多藉
此餬口積久相安從無違犯而附近居民就近買
食亦頗稱便是此數州縣向係肩販持引行銷納
課卽與官鹽相仿雖有肩販未經之地其逼近場

竈處所向有老少鹽斤以便民食而十二州縣通
共額數僅止六百餘名實屬爲數無多稽查甚易
與兩淮鹽場情形不同應准其照舊辦理仍令該
督撫飭所屬悉心經理勿使日久法弛致滋流弊
并各州縣現存老少名數分晰造冊報部查核至
該省場竈餘鹽原有發帑官收之例自應儘數收
買以杜其私賣之源應令該撫隨時酌看旺產情
形悉心經理據實核辦并嚴飭文武員弁督率兵
役人等於私鹽出沒處所不時實力查緝勿致懈

弛可也奉

旨依議欽此

乾隆四十四年七月兵部爲遵

旨會議事據浙江巡撫兼管鹽政王亶望奏稱原設驛
傳道康熙四十九年裁汰改歸兩浙都轉鹽運使
兼管緣運使無兼郵政之例改爲鹽驛道今驛務
既不令兼管應否復還舊銜抑或改爲浙江鹽道
關防其各巡道關防內應添鑄兼管驛務字樣均
請另行換給至鹽道傳

敕內開載兼管水利字樣查通省水利已責成巡道兼管其鹽道應毋庸添載水利惟臬司兼管驛務原頒印信毋庸改鑄其傳

敕內應添載總理驛務各巡道傳

敕內均添載兼管驛務字樣以昭信守等語查驛務既經改歸各巡道管理鹽驛道僅止專管鹽務應准改爲浙江鹽道關防其所請復還舊銜運使之處毋庸議奉

旨依議欽此

乾隆四十四年八月禮部爲遵

旨會議事議覆浙江巡撫王亶望等奏請裁商籍學額等因臣等伏查浙江省杭府仁錢二邑向爲人文淵藪原設商籍學額現商乏商俱准一體收考今據該撫奏稱現在清釐商籍中乏商後裔竟居十之七八其實係業鹽正商親子弟姪與例符者不過寥寥數人是浙省現商子弟人數無幾商籍學額實爲仁錢士子進身之一途久在

聖明洞鑒之中況該省商學向無專設教官及廩增額

數取進各生卽分撥杭府仁錢三學凡幫補廩增
出貢中式卽佔仁錢之額其中人才輩出誠如

聖諭與長蘆山東情形不同自未便議請裁汰臣等謹
遵

旨酌議嗣後浙江商籍歲科兩試取進名額仍應照舊
辦理其真正商人後裔與現在領引行鹽之商人
子弟准其一并收考仍飭令該撫及該學政隨時
查察責成甲商廩保認識保送勿滋頂冒影射等
弊至商籍各生既係附入杭府仁錢三學卽與民

籍生員無異亦應仍照舊例鄉試之年俱令散入
民卷憑文取中不必另行編立鹵字號再該撫所
稱現在清釐商籍勒限改歸之處除已經改歸本
籍各生毋庸議外其未及呈請改歸者查無冒濫
情節卽停其改籍無事更張內有曾經出仕中式
者俱照此畫一辦理庶民商均沐

樂育之仁而

聖朝益昭文化之盛是否有當伏乞

皇上睿鑒奉

旨依議欽此

乾隆五十六年八月戶部爲浙省鹽務仍照舊定
章程事據浙江巡撫兼管鹽政福崧奏稱浙省引
鹽係行銷本省十一府及江蘇之蘇松常鎮四府
太倉一州安徽之徽州一府廣德一州并江西之
廣信一府向係各銷各地俱有隘口關津藉以遮
攔稽察核計賣地水程近則二三百里遠亦不逾
千里商民兩便積久相安並無舍近就遠扞格難
行之弊其廣信一府昨准江西撫臣姚綦以鄰近

之饒州府屬例食淮鹽可否將廣信府屬亦改食淮鹽之處移咨商辦臣當卽督同藩司鹽道體察情形虛衷籌酌查浙鹽運至廣信共計程九百餘里若由淮安配運計有二千四百餘里程途遠近懸殊價值貴賤不一是以久食浙鹽商民稱便惟在嚴緝私販自毋庸另議更張臣現已詳細咨覆仍循其舊至浙省鹽務近年以來官引積壓諸多廢弛臣現已逐一清理惟有嚴督所屬隨時整飭實力稽察務使私販斂戢官引暢銷以冀仰副

聖主恤商惠民

恩施無已之至意奉

旨知道了欽此

乾隆五十八年二月吏部奏稱奉

旨將浙江鹽法道一缺改爲鹽運使查鹽運使各缺內
惟直隸係繁要缺向來請

旨補放其兩廣係繁疲難要缺兩淮係繁難中缺山東
係繁簡缺向皆開列具題查均係鹽運使之缺有
請

旨開列不同辦理稍覺參差且鹽運使與道員相同均
係知府應陞之缺現在鹽運使遇有缺出屢經奉
旨補放自應一體酌定將直隸兩廣兩淮山東各缺及
新改浙江鹽運使員均改爲請

旨之缺恭候

簡用其浙江鹽法道一缺原係衝繁中缺今改爲運使
仍定爲衝繁中缺以昭畫一至浙江杭州織造改
爲鹽政兼管織造事務鹽道改爲運使一切應行
酌辦事宜以及印信各項統令浙江巡撫鹽政等

全案在部鹽政全案卷一
確核現在情形分別妥議題咨到部再行辦理奉
旨依議欽此

乾隆五十八年三月戶部爲遵

旨議覆事據兩浙鹽政全德奏稱本年癸丑已屆開綱
而舊引積壓過多有礙新綱地步請將積引內銃
銷壬子綱引七十萬道其正雜錢糧自癸丑綱起
分五年帶完等語查兩浙年額應銷引目八十萬
五千餘道今積引一百二十八萬餘道幾逾一年
半之額該鹽政奏請銃銷壬子七十萬引分爲五

年完課係爲疏通積滯起見應准照所奏辦理但兩浙鹽務向係年清年額從無統銷之案此次積引過多自應量予調劑嗣後不得援以爲例至前項積引除統銷外尚有五十餘萬道摺內旣稱一二年內可以帶銷完竣並臚陳積引旣疏新綱必暢等語該鹽政調任浙江係該省專設鹽政之始一切緝私趨運事宜是其專責務當實力疏銷俾積壓引目剋期帶竣以收實效應令該鹽政將帶銷年月勒定期限先行呈報仍俟帶竣之日專案

報部查核此後倘再仍前壅滯卽將該鹽政從重
治罪再查該處既有積引一百二十八萬餘道歷
任兼管鹽政之巡撫並不及早籌辦殊屬墮誤應
行該鹽政按積引年分查明歷任巡撫鹽道職名
送部嚴加議處是否有當伏祈

皇上訓示奉

旨依議欽此

乾隆五十八年五月吏部爲遵

旨酌定會核章程事議覆浙江巡撫覺羅長麟等奏稱

浙江鹽政向係巡撫兼管茲奉

諭旨改設鹽政專司其事令巡撫隨時稽查仰見

皇上杜弊周詳之至意伏查巡撫鹽政同駐省城有例
應會核會辦事件現屆改設之初自宜議定章程
以重考核而免歧誤查例載鹽場各官該鹽政會
同督撫考核分別舉劾具題臣全德前在兩淮任
內凡所屬大小官員題陞調補暨大計舉劾以及
盤查運庫奏銷考成等案悉與督撫札商由鹽政
衙門主稿會同督撫題達今奉調浙情事相同謹

將兩淮奏定條例逐一酌核仿照辦理另繕清單
恭呈

御覽等因奉

旨該部議奏欽此臣等謹就該撫等所奏各款分別核
議請

旨遵行

一奏稱鹽屬運副運判各一員如遇缺出在外題
補應由運司會同藩司揀員具詳巡撫鹽政會
同題奏仍列總督銜等語查各省鹽運司運副

運判缺出定例令該督撫會同鹽政揀員具題
今巡撫會同鹽政題奏仍列總督銜與例相符
應如所奏辦理

一奏稱場所庫各大使并運司經歷等官遇有缺
出將試用人員揀補亦有將現任之員調補而
將試用人員補所遺之缺者俱由運司會同藩
司具詳鹽政主臺會同督撫題咨等語查地方
鹽務官員各有統轄以專責成場所庫大使運
司經歷等官係鹽政專管遇有缺出題請調補

署理應由鹽政主稟會同督撫題咨與例相符
應如所奏辦理

一奏稱鹽屬各官凡遇大計三年由運司將應舉
應劾之員填冊主稟密封通詳督撫鹽政會核
彙題等語查運司職司鹽務其鹽屬各官三年
計典應舉應劾應由運司填冊主稟密封通詳
督撫鹽政會核具題與例相符亦應如所奏辦
理

一奏稱試用人員將次補完續請揀發應鹽政專

摺奏請毋庸會同督撫等語查本年二月吏部
條奏各省員缺原有定額其應在外揀調者由
該督撫揀選調補其應歸部銓選者由臣部按
班議選查在部候補候選人員各有班次得缺
不致參差若一經揀發不論先後名次到省後
即可題咨得缺徑途似覺捷便應請嗣後除直
隸爲

畿輔重地政務殷繁雲南貴州四川廣東廣西福建
奉天甘肅或有額設滿缺或係邊遠省分仍准

酌量奏請揀發其餘江南等近省及各省鹽場等缺所有奏請揀發之處槩行停止等因奉

旨諸凡皆妥如議行欽遵在案應將該撫等所請揀發人員應由鹽政專摺奏請毋庸議

一奏稱鹽政衙門應解京協各餉應委鹽屬官員領解巡撫衙門應解京協各餉應委地方人員領解不必互相差委等語均應如所奏辦理

一奏稱每年鹽課奏銷及遇運司交代盤查庫項應巡撫鹽政會同盤查出結由鹽政主彙會題

等語亦應如所奏辦理

一奏稱每年綱竣各官銷引考成等冊應由運司
造送鹽政核題等語查兩淮鹽引奏銷向係鹽
政會同兩江總督具題今兩浙正餘鹽引奏銷
考核等案亦應會同巡撫具題以昭畫一
一奏稱浙江鹽道已奉

旨改爲鹽運使所有該道關防應請改鑄兩浙江南都
轉鹽運使司之印又鹽道衙門傳

敕一道亦應照新銜換給以昭信守俟內閣禮部頒發

到日將舊

敕舊關防照例繳銷等語查新改鹽運使所需印信應如該撫等所擬兩浙江南都轉鹽運使司之印吏部兼寫清漢移咨禮部鑄給頒發所需傳

敕移咨內閣撰給頒發其原設鹽道傳

敕關防照例咨送繳銷奉

旨依議欽此

乾隆五十八年九月戶部爲酌改竈課徵收事議覆兩浙鹽政全德奏稱竊照兩浙竈地向由場員

設櫃徵收原封解交州縣拆并轉解鹽庫良由巡撫兼管鹽政地方皆其管轄可以隨時提解今奉上諭復設鹽政州縣已非專管且以場員徵收現成之錢糧轉手於州縣徒滋周折更慮有挪移延宕之弊查兩淮竈課由場徵場解浙省自不應獨異請將各場歲徵竈課錢糧卽由場員徑解運庫兌收毋庸解交州縣轉解以專責成如場員經徵不力亦照兩淮之例處分又竈戶置買產業例應稅契以杜詐僞乃浙江惟寧波府屬鄞縣慈谿象山鎮

海四縣竈地由縣稅契此外各場並不投稅僅由
鹽大使印給方單以爲執守查方單不過聽竈戶
自行填單送場印發其與契券是否相符並無稽
考且匿報無單者亦多以致控爭之案毫無依據
斷理現據司府等議請改用官設契尾以杜訟端
具詳前來覆核契尾之設原所以絕假冒而裕稅
課民竈事同一例應請嗣後由運司照例刊頒契
尾印發各場凡竈戶頂買地土將契赴場投稅粘
用契尾給業戶收執至從前舊置產業原頒方單

限一年之內繳換契尾如限滿不換以漏稅論其
稅銀照例每兩三分年終彙解報部如有徵多報
少情弊察出治罪所有寧屬之鄞慈象鎮四邑竈
戶產契一體歸場投稅等語臣等伏查徵解竈課
原係場員專責今兩浙設立鹽政專管鹽務自宜
督率場員徵解竈課以專責成應如所奏卽將各
場應徵竈課查照兩淮之例由場員徑解運庫以
免州縣拆并轉詳之煩且杜周折挪延之弊倘場
員經徵不力卽照兩淮之例處分仍將督催不力

之運司一併於題銷疏內聲明報叅至竈戶置買產業例應稅契以杜詐僞今該鹽政等請將向來稅契之各場竈戶凡有置買產業者將契赴場投稅粘用契尾給業戶收執之處亦應如所奏轉飭運司刊頒契尾印發各場凡竈戶頂買地土將契赴場投稅粘用契尾給業戶收執以爲確據其向來由縣投稅之鄞縣慈谿象山鎮海四處竈戶一體歸場投稅均照例每兩收稅三分彙解運庫由該鹽政於年終核明確數專案咨報並據奏稱從

前竈戶舊置產業原頒方單限一年之內繳換契尾既係該省自定限期並令接准部文之日起依限清釐辦理奉

旨依議欽此

乾隆五十八年十一月戶部爲請給鹽政養廉事
議覆兩浙鹽政全德奏前事等因臣等伏查兩淮
鹽政每年養廉銀二萬兩內除奏准於歲支養廉
銀二萬兩內支給各商代辦貢物銀一萬七千兩
每年實止支養廉銀三千兩長蘆鹽政每年養廉

銀二萬兩內除歸公捐修等銀五千三百兩外又
奏明撥發辦貢銀一萬一千七百兩每年實止支
銀三千兩經臣部於每年報銷冊內稽核在案今
據兩浙鹽政全德奏稱兩浙鹽政自改歸巡撫兼
管後卽將鹽政養廉奏裁又杭州織造兼管關務
每年支給養廉銀一萬兩并鹽規銀一千六百兩
本年將關務改歸巡撫兼管又經前撫臣長麟將
關務養廉奏請歸公現在鹽政織造均無養廉可
支其織造鹽規銀一千六百兩內以一半例解內

務府飯食等項外實支銀八百兩今兩浙鹽政復設專員應否議給養廉之處恭摺具奏等語查設官分職議給養廉原資辦公之用今兩浙復設鹽政正當清釐整飭另立章程之際自應酌與養廉以資公用今臣等悉心酌議兩浙鹽政每年給予養廉銀一萬兩內將銀七千兩循照兩淮長蘆鹽政之例支給各商備辦貢物外每年實止支銀三千兩如此辦理其實支銀數既與兩淮長蘆鹽政相同而備辦貢物亦係照該二處之例以臻畫一

且免致藉口攤派以杜日久弊生之漸如蒙

俞允臣部卽行文該鹽政遵照辦理并將支給養廉銀款按年造冊報部備核可也奉

旨依議欽此

乾隆五十九年四月戶部爲浙省產鹽短少請暫買淮鹽接濟事據兩浙鹽政全德奏稱浙省去冬今春艱產場鹽不能存積若遇大雨時行必至缺乏查明兩淮各場積存鹽斤甚爲充裕儘可通融請照二十九年之例浙商暫買淮鹽以五萬引爲

率俾資接濟並請在於浙省運庫內暫撥銀二十萬兩委員帶領浙省總商會同淮商照依時價在通泰各場收買按照浙引斤兩捆定鹽包令浙商各計該岸應需若干引之處先在浙省運庫按引完納錢糧並繳清買價等語查係爲浙鹽存積不多恐致缺乏量爲調劑之意且兩淮距浙路程較近運鹽較速淮鹽既屬充裕援照二十九年改運淮鹽成案通融籌備應如所奏飭令浙商暫買淮鹽以五萬引爲率並准暫撥浙省運庫銀二十萬

兩卽令暫護兩浙鹽政阿林保照數撥給委員帶領浙省總商會同淮商照依時價收買仍按照浙引斤兩捆包令浙商計岸需引若干先在浙省按引完納錢糧繳清買價始准給與照票齎赴泰州過壩掣驗務將浙商名下應完錢糧應繳借項全數繳完運庫不得任有零欠不清等事仍將應完銀數日期專案報部至稱察看浙省產鹽情形如足敷接濟則不必運足五萬引倘或不敷量加增買之處均令該鹽政察看浙省情形妥爲籌辦隨

時報部備核可也奉

旨依議速行欽此

乾隆五十九年十二月戶部爲遵

旨議奏事題覆浙江巡撫兼署鹽政吉慶奏稱本年七
八月松江所沿海猝被風潮竈地歉收業將竈課
錢糧奏請緩徵惟是該所需鹽除配運外存貯尚
多若不歸商收買竈本支絀續煎無力不獨缺誤
來年民食且恐現鹽透漏售私於官引更有關礙
但該所商本微薄現又散在各地一時難以收買

請循照從前借帑輸羨之例賞借銀四萬兩於運庫公費項下動支承領加一輸羨分限三年完繳羨隨本減等語臣等伏查竈戶以前煎鹽爲業全賴商人收買配運源源煎辦今松所竈戶值此歉收之際有鹽無售則於來年民食或有缺誤且難免現鹽透漏售私致礙官引之弊所有該鹽政奏請循照向例借帑輸羨俾商人收買有力竈戶得本資煎自爲因時調劑鹽務起見應如所奏准其於公費項下支領銀四萬兩加一輸羨自乾隆六十

年起分限三年完繳羨隨本減卽令該鹽政將領銀日期先行報部仍將完繳本羨銀兩按年造入帑鹽案內具題查核并令該鹽政嚴飭所屬實力緝私毋得絲毫透漏務期於商運民食均有裨益奉

旨依議欽此

嘉慶四年十一月十七日兩浙鹽政延豐奏爲鹽屬

計典展限事竊照本年屆當舉行

大計鹽屬各員例應於十二月內由鹽政主稟會同督撫恭疏具題臣仰蒙

聖恩補授兩浙鹽政於本年十月初五日到任計至年終未滿三月所有鹽運使及兩分司并近省鹽場大使等官隨時接見講論公事尚可悉其梗槩其離省各鹽場或相距五六百里至千餘里不等該場員等未經接見者尚多賢否不能周知若僅據運使分司稟報以定舉劾似非慎重考核之道理合照例恭懇

聖恩俯准將本年鹽屬各官

大計展至嘉慶五年三月舉行俾臣得以悉心考察會同督臣撫臣詳加甄別以昭激勸奉

旨准展限應詳慎欽此

嘉慶六年五月戶部爲遵

旨議奏事據浙江巡撫阮元鹽政延豐會奏寧波府屬之鎮海縣境設有清泉龍頭穿長三場該地民竈相錯其竈產而隸縣籍輸糧者謂之竈課其海塗刮土煎鹽完納課稅者謂之丁課名目雖殊俱歷

由該縣徵解迨後奉文將丁課交場代收仍由縣彙解旋於乾隆五十九年專設鹽政議改章程案內經該縣場會議以地丁歸并界限難分請循舊章將竈課一并歸縣徵解當經前撫臣吉慶於乾隆六十年咨部覆准在案嗣該場等以雍正四年丁歸地輸原案有新漲應予抵除之議嗣後地有坍漲課應抵減或有隔手未便之處請將丁課一項劃作場徵經前鹽政臣蘇楞額於嘉慶二年據詳咨部戶部以事出兩歧令再確查妥議續據濱

司運司議詳咨覆請照前撫臣吉慶咨案辦理復經部臣行令臣等會議具奏等因臣等會查該三場多有地坍丁存之戶海塗無幾卽將縣徵竈地一律均攤是以該地竈產不禁民買由縣稅割與場員專管海塗例禁出售於民者迴別今若地課歸縣丁課歸場是一地而兩徵倘或彼此查察未週則重複脫漏之弊卽由此起若謂地有坍漲課應抵減該場儘可隨時移縣核辦並非窒礙難行又課歸縣徵竈籍未裁審丁不改亦不至引壅課

細且由縣統徵年久相安自不若循舊徵收較爲
妥善至該縣場暨運司等中間議辦兩歧之處臣
等詳加體察尚爲便民便竈起見並無別情應請
俯如所議將清泉龍頭穿長三場應徵丁課銀一
千二十三兩零仍同竈地課銀由鎮海縣按數徵
收報解以免紛更而歸畫一等因應如所奏將清
泉等三場竈課丁課統歸鎮海縣徵收以昭畫一
奉

旨依議欽此

嘉慶六年七月兩浙鹽政延豐爲籌溶松江運鹽河并將掣鹽廳與批驗所衙署互換移建事竊查松江郡城之西南有河一道名二里涇爲松所商人運鹽河道涇之北岸東首建有掣鹽廳西首建有批驗所大使衙署涇以南有江名黃浦黃浦以西由舊壩河可通二里涇之西口黃浦以東由米市塘河可通二里涇之東口各場鹽捆運赴掣向俱從東浦進口經由米市塘河至二里涇掣鹽廳前停泊候掣開行查二里涇西口舊有石壩攔截

黃浦江潮水兼杜倫越諸弊乾隆六年因此壩於兩岸農田灌溉有礙經原任兩江督臣楊超曾等奏准開壩通流於西口要隘添建木柵以時啟閉責成批驗所大使隨時稽查又以二里涇東西受潮易於淤塞鹽船行運不便請每年於江蘇藩庫浙江運庫各動支銀五百兩發商以爲挑河修柵之用工竣報銷迄今六十年兩岸淤泥堆積日高挑濬未久一經雨淋仍復淤積旣帑項不無虛糜且各商於開河時運沙堆積未免農田稍礙商民

往往因之以起爭端兩有不便近八九年或雨水充足或東作方興或雨雪凍阻未曾領項辦理歷經聲明咨部在案臣今春至松掣驗引鹽各商鹽船俱停泊黃浦江東口候掣因沙淤河淺不能直抵掣廳應提鹽包俱用小船載至二里涇東口又用人夫擡至掣廳方始掣驗各商未免費繁并恐不肖商人難保無從中勾串滋弊等情兼之船停江口風潮時虞實多未便臣乘坐小舟週圍履勘二里涇迤東河窄淤厚開復爲難迤西河寬淤淺

疏濬較易今昔情形實有不同臣愚見擬將東首之掣鹽廳改爲批驗所衙署其西首之批驗所衙署改爲掣鹽廳於二里涇西口開濬深通卽令各商鹽船改進西浦口由舊壩河運抵新改掣廳前停泊候掣仍畱木柵責成批驗所大使稽查鹽船出入用昭嚴密第查二里涇西口旣經濬挖則迤東泥淤益高恐致下卸而水亦有洩無蓄擬於自西至東挑挖交接之處築小石壩一座攔住東流以資該地農田灌溉其來往行船另有米市塘河

可通此涇雖經築壩斷流於舟楫亦無不便如此
一酌改間不但商民兩益以後每年亦無需歲修
之費并據松所甲散各商具稟改濬河道移建掣
廳所署實爲衆商一勞永逸之計一切經費情願
公捐辦理卽將來日久稍有淤積商等亦情願自
行捐濬等情臣伏思二里涇河本爲松所商人運
鹽而設與其歲糜帑項無所底止不若酌量改移
一勞永逸況現擬開濬西口河道工段不長移建
掣廳所署本有舊料需費無多該商等旣願捐資

自辦亦不致有苦累嗣後每年應領挑河銀一千兩應請停止以歸簡省洵於商民帑項均有裨益臣由松過蘇時與撫臣岳起面加商確并札商兩江督臣費淳意見均屬相同謹繪圖貼說合詞恭摺具奏伏祈

皇上睿鑒奉

旨依議任其自辦可也欽此

欽定重修兩浙鹽法志卷十二終